

Malaysia, Uzbekistan tingkat kerjasama pendidikan antirasuah

Anwar, Mirziyoyev turut setuju perkukuh hubungan sektor pelancongan

Putrajaya: Malaysia dan Uzbekistan menegaskan komitmen mereka untuk memerangi rasuah, selain memperkukuh hubungan dua hala serta kerjasama dalam bidang pendidikan, pelancongan dan sektor lain.

Dalam kenyataan bersama, Perdana Menteri, Datuk Seri Anwar Ibrahim dan Presiden Uzbekistan, Shavkat Mirziyoyev turut menzahirkan penghargaan terhadap kerjasama sedia ada di antara badan antirasuah kedua-dua negara.

“Mereka bersetuju mempertingkatkan kerjasama dalam pendidikan antirasuah untuk penjawat awam dan pegawai penguat kuasa undang-undang serta

mempromosi pertukaran pengalaman dan amalan terbaik secara berkala mengenai isu antirasuah,” menurut kenyataan itu.

Kedua-dua pemimpin juga bersetuju untuk memperkukuh lagi program pertukaran di antara institusi pengajian tinggi dan institut penyelidikan sebagai sebahagian daripada usaha untuk mempromosi hubungan di antara rakyat dan saling memahami di antara kedua-dua negara.

Kenyataan itu juga menekankan kepentingan memperluas kerjasama pendidikan dalam bidang seperti penyelidikan bersama, perkongsian akademik, serta perkongsian kepakaran, untuk mempererat hubungan dan pertukaran pengetahuan di antara Malaysia dan Uzbekistan.

Kenyataan bersama itu dikeluarkan sempena lawatan rasmi pertama Presiden Mirziyoyev ke Malaysia selama dua hari, atas jemputan Anwar, yang bermula semalam.

Terdahulu, Mirziyoyev yang memegang jawatan Presiden sejak Disember 2016 dan berkhidmat sebagai Perdana Menteri Uzbekistan sejak 2003, diberi-

kan sambutan rasmi di Perdana Putra sebelum mengadakan pertemuan dengan Anwar, yang melawat Uzbekistan pada Mei tahun lalu.

Tingkat hubungan dua hala

Kerjasama dalam bidang pelancongan antara bidang utama yang dibincangkan, dengan kedua-dua pemimpin mengakui potensi sektor ini untuk meningkatkan hubungan dua hala.

Kedua-dua pemimpin juga bersetuju memanfaatkan kempen ‘Tahun Melawat Malaysia 2026’ serta meneroka peluang dalam pelancongan Islam dan industri halal, termasuk mempromosi program ‘Umrah+’ bagi memasarkan Malaysia dan Uzbekistan sebagai destinasi pelancongan pra atau pasca haji bagi pelawat dari kedua-dua negara.

Bagi meningkatkan aksesibiliti, mereka juga bersetuju memanfaatkan penerbangan langsung Kuala Lumpur-Tashkent yang dikendalikan oleh Uzbekistan Airways dan Batik Air Malaysia.

Dalam kenyataan bersama itu, kedua-dua pemimpin tu-



Anwar bertukar dokumen dengan Mirziyoyev di Kompleks Seri Perdana, Putrajaya, semalam.

(Foto BERNAMA)

rut menzahirkan kepuasan terhadap kejayaan berterusan Program Kerjasama Teknikal Malaysia, yang memainkan peranan penting dalam meningkatkan hubungan dua hala serta memupuk kerjasama yang lebih erat di antara kedua-dua negara.

Sejak terjalannya hubungan diplomatik di antara Malaysia dan Uzbekistan pada 1992, kedua-dua negara menikmati manfaat bersama dalam pelbagai

bidang kepentingan.

Pada 2024, jumlah dagangan di antara Malaysia dan Uzbekistan ialah RM369.8 juta (US\$80.9 juta), berkurangan sedikit sebanyak 13.2 peratus berbanding RM426.1 juta (US\$94 juta) yang direkodkan pada 2023.

Pada tahun yang sama, im-bangan perdagangan juga memihak kepada Malaysia dengan jumlah RM360.3 juta (US\$78.9 juta). BERNAMA